



## 予醫生看敢的確愛食藥？

俗語講：「求簽託佛定著有毋著，予醫生看的確著愛食藥」，敢有影？

十幾年前，我捌因為感著，去病院予醫生看，醫生開藥仔予我食，結果食藥仔了後，閣吐閣落，一擺比一擺較嚴重，第三擺是吐、落閣兼烏暗眩，予人叫 oonn-inn-oonn-inn 送去病院掛急診。醫生診斷了後，講是某一種抗生素的藥仔過敏所致的，閣講好佳哉我是用食的，若是用注射的可能就袂赴市矣！以後，我所有的病歷表面頂，攏有註明我對這款抗生素過敏。

這件代誌，嘛予我想起我捌有兩個朋友，攏是因為去感著，去予個所熟似的醫生看病，結果攏真緊就往生去。我臆，可能是醫生好意，欲予個的病較緊好起來，用注射抗生素來治療，結果煞發生副作用，造成悲劇。

無論是西藥抑是漢藥；是用食的、抹的、注肉射、注血筋抑是點的目藥水，都攏會有副作用，干焦是輕佻重、緊佻慢的精差爾爾。其中，抗生素是一種對治療發炎誠有效的藥品，毋過若拄著對某種抗生素會過敏的人，會有真大的危險性，而且以早對某種藥品無副作用，並無代表以後對彼種藥品就攏袂有副作用。

當然，比較起來，注射比用食的、抹的，作用的時間較緊，嘛會較緊好起來。毋過，無拄好命嘛會較緊無去。所以，長久以來，若毋是咧蹠院治療，而且無絕對的把握，正牌的醫生是袂隨便共人注射，驚講若發生意外，才會當隨時處理。

閣再來，現代的醫生嘛較了解所有的藥品攏是有副作用的，所以佇藥品的份量佻食藥的時間攏會有咧擲節，若認為無必要，干焦會叫你日常的生活著愛注意啥貨，袂清彩開藥仔予你食。若無，無定著會開一寡安慰劑予你罔食，食心安的，橫直袂有敗害。

所以講，這陣去予醫生看，就無一定著愛食藥仔矣！

作者：陳憲國

### ☆詞彙學習☆

【定著】tiānn-tiòh：一定。

【感著】kám--tiòh：感冒。

【落】làu：此處指拉肚子。

【烏暗眩】oo-àm-hîn：眩暈，眼前發黑。

【臆】ioh：猜測。

【注肉射】tsù-bah-siā：肌肉注射。

【精差】tsing-tsha：差別。

【袂赴市】bē-hù-tshī：來不及。